

六藝之一錄

百六一

六書之一

書一

總校官檢討臣何思鈞

校對官中書臣陸湘

謄錄監生臣王宮

欽定四庫全書

六藝之一錄卷三百七十二

錢唐倪濤撰

歷朝書譜六十三

明

黃道周

黃道周字幼玄一字螭若號石齋漳州人博搜廣覽書無不通詩文隸草皆自成一家天啟壬戌進士選

庶吉士授編修歷官禮部尚書

黃石齋行狀

黃幼玄奏揭 黃銅山與蔣八公札二卷 黃石齋

簪筆披襟詩帖草書

式古堂書
畫彙考

黃銅山與蔣八公札二卷

外翁解相印歸鑪偶從案頭見石齋黃先生手書二冊近百葉皆詔獄中與翁逕返案牘也先生臨池高妙不必言至造次顛沛中信紙直書顏筋柳骨不失尺寸斯豈臨池之技乎抑不獨黃先生難也先生櫻鱗履虎甘刀俎如飴而吾翁獨傾身擁護百計脫黃

先生於厄時鉤黨漸興鉗網四射遂有草頭一將之
謠非徐虞求王素公張鯢淵三君子密鳩千金寢其
事幾罹不測噫亦危矣史籍所載虞卿孔融輩然諾
相死皆一時矜激無濟毫末眎數君子臣節友誼何
如哉然使此數君子不幸而以臣節友誼特著又豈
世道之福乎言念及此閣筆三嘆甲申臘望周廷鑑

元立謹識

式古堂書
畫彙考

石齋先生中黨人之禍禍且不測至有以白冠釐纓

之說進者生平款好大都屏跡以謂事無可如何徒
自及爾獨吾師力為營救義不反顧卒先生所繇脫
者繫吾師之力也當是時遂有蜚語及師同志震悚
而師目不為瞬久之事罷吾鄉徐冢宰曰若輩之伎
倆有盡八翁之不見不聞無窮諒哉蓋吾師義篤友
朋實愛深君父誠恐望風下石之徒塵黷聖德為天
下萬世慮至深遠也方先生下詔獄師告之曰自明
夷演易後名賢幽繫皆著書自見若不能脫子於險

我責也子無成書子責也故先生獄中所著有春秋
論斷詩序正易象正等書又手寫孝經百本頌颺聖
孝今觀往來諸牘皆履險經危之具而兩賢敦勉道
誼獨立不懼之槩具可想見即其文辭斐然書法一
本鍾王又何其從容不苟也古人之美何足以云華

亭門人張壽孫謹跋

同上

洪周祿

洪周祿字半石黃岡人天啟壬戌進士授戶部主事

出知常州府解綬歸里肆志詩文行草書妙絕一時

為董思白所賞

湖廣通志

諸清臣

諸清臣字清之會稽人日臨魏晉隋唐諸帖輒忘其

疲

來禽館集

婁堅

婁堅字子柔嘉定人經明行修學者稱為大師五十
貢於春官不仕而歸書法妙天下風日晴美筆墨精

良方欣然染翰不受促迫

嘉定志

宋珏

宋珏字比玉莆田人善八分書規撫夏承碑蒼老雄

健骨法斬然

閩書

陳元素

陳元素字古白書法歐陽率更精楷入神

蘇州志

陳古白書海嶽菴小記

此菴在北固山下乃丹徒趙令君所自記者陳太學

古白既為書碑石而又縮小書此以便學者古白天
心筆陣不下長公而狷介不苟有米老之潔其於篤
志之君子千古可無愧色已

墨林
快事

魯得之

魯得之字孔孫為太僕李日華入室弟子工寫竹兼

工歐虞書法

嘉興
志

何白

何白字无咎永嘉人幼時為郡小史龍君御為郡司

理異其才為加冠集諸名士賦詩以醺之為延譽於
海內遂有盛名西遊酒泉南窮湘沅歸隱梅嶼山中

能書善畫

永嘉
定

吳周生

吳周生新安人董其昌墨禪軒說云周生坐擁萬卷

博雅好古尤精八法

歛乘

朱茂曙

朱茂曙字子衡秀水人文恪公國祚之孫為縣學生

工行楷書為董文敏所稱私諡安度先生

堯峰文抄

朱茂皖

朱茂皖字子芾號芾園

茂曙弟

補諸生以學古聞雋經

糾史蠶頭細書盈篋滿笥未嘗少暇息

俞汝言漸川集

汪淮

汪淮字汝又休寧人好稱詩尤工書法嘗書陽山寺

額董宗伯其昌過休寧見之歎曰此中有人

徽州府志

俞可進

俞可進字子漸婺源人精鍾王書法雲間董玄宰陳
眉公見其所書黃庭心經驚為絕品

同上

李永昌

李永昌休寧人善書與董思白齊名思白雅重之所

書如董筆云

徽州府志

洪度

洪度黃梅人精書法一日洪濤浮敝篋發之乃宋僧
道肯集篆金剛經字久磨滅精思七晝夜重臨刻石

宗伯董其昌釋以小楷藏京師摩訶菴

湖廣通志

沈瑞徵

沈瑞徵字靈繹號玄圃博學工詩文書法鍾元常見

知董文敏

海寧縣志

徐弘澤

徐弘澤字潤卿號春門書法從吳興取途晚愛張伯

雨遂與姚丹邱頡頏

恬致堂集

沈叔淳

沈叔淳更名自新字曼倩壁窠字學眉州雙井又能

篆籀

同上

陸鳴和

陸鳴和字三孺隱竹橋里李日華六君詠云七歲誦

騷賦十年摹右軍藝翰兩奇絕卓哉超輩羣

六研齋
三筆

吳秋林

吳秋林歙人寓春波里門無雜賓時時襆被就羽人

釋子假榻焚香煮茗意蕭如也書法趙吳興

紫桃軒
雜綴

陸元厚

陸元厚家貧為童子師性方嚴行止踴踴喜蓄異書

書摹急就婉逸有態

同上

沈行叔

沈行叔富有六書之學其所剖析務極於微眇上溯

篆籀下逮隸分有邁必收有蓄必奇

學古
緒言

朱纓

朱纓字清文嘉定人書工小篆及行楷不多為詩而